

Nao wauimba wimbo wa Musa, mtumwa wa Mungu, na wimbo wa Mwana-Kondoo, wakisema, Ni makuu, na ya ajabu, matendo yako, Ee Bwana Mungu Mwenyezi; Ni za haki, na za kweli, njia zako, Ee Mfalme wa watakatifu.—Ufunuo 15:3.

Kristo mrelipatia kanisa Lake agizo takatifu. Inampasa kila muumini kuwa mfereji ambao Mungu atautumia kuwasilisha kwa ulimwengu hazina za neema Yake, utajiri wa Kristo usiochunguzika. Hakuna kitu Mwokozi alichio na shauku nacho sana kama udhihirisho wa upendo wa Mwokozi kupitia wanadamu. Mbingu yote inawasubiri wanaume na wanawake watakaotumiwa na Mungu kufunua uwezo wa Ukristo.

Kanisa ni wakala wa Mungu wa kuutangaza ukweli, wakiwa wamewezeshwa naye kufanya kazi maalum; na kama kanisa litadumisha uaminifu Kwake, likizitii amri Zake zote, litajazwa ubora wa neema ya kimbingu. Endapo kanisa kama jamii ya waaminio watakuwa wakweli kwa wajibu wao, kama watamheshimu Bwana Mungu wa Israeli, hakutakuwa na nguvu itakayosimama kinyume chake.

Ari kwa ajili ya Mungu na kazi yake iliwasukuma na kuwagusa wanafunzi kuchukua ushuhuda wa Injili kwa nguvu kubwa na ya ajabu. Je! Moto kama huo wa ari usingewaka mioyoni mwetu kwa dhamiri ya kusimulia kisa cha maisha na kusulibiwa na upendo wa Kristo unaokoa? Ni fursa kwa kila Mkristo si kutazamia tu bali pia kuharakisha marejeo ya Mwokozi.

Endapo kanisa litajivika vazi la haki ya Kristo, na kujiondoa katika mfungamano wowote na ulimwengu, litapokea nuru ya mapambazuko na ushindi uliotukuka. Ahadi ya Mungu kwa kanisa itasimama thabiti milele. Atalifanya kuwa bora kabisa milele, furaha ya vizazi vingi. Ukweli, japo utabazwa na kudharauliwa, hakika utashinda. Ingawa wakati fulani ukweli ulipitia vikwazo ikaonekana kana kwamba kasi yake imedhibitiwa, kwa hakika maendeleo yake kamwe hayatazuilika. Wakati neno la Mungu linapokutana na upinzani, huwa analipatia nguvu ya ziada ili litoe nguvu zaidi za ushawishi. Likiwa limepewa nguvu za kimbingu, litapasua njia hata palipo na vizuizi vigumu kabisa na kupata ushindi kwa kila kikwazo.

Ni nini kilichokuwa kinamtia moyo Mwana wa Mungu kusonga mbele licha ya vikwazo tele na kujikana nafsi? Aliyaona matokeo mazuri ya masumbuko ya nafsi Yake naye akaridhika. Alipokuwa anautazama umilele, aliiona furaha ya wale waliokuwa wamepokea msamaha na uzima wa milele kwa sababu ya kudhalilishwa kwake. Masikio Yake yalisikia kelele za waliokombolewa. Aliwasikia waliolipiwa fidia yao wakiuimba wimbo wa Musa na wa Mwana-Kondoo....

Kwa imani tunaweza kusimama langoni mwa mji wa milele na kusikia sauti za mwaliko wa heshima watakazopewa wale waliokuwa wanashirikiana na Kristo kwenye maisha haya, wakichukulia kuteseka kwa ajili Yake kuwa heshima kubwa (Matendo ya Mitume, seh. 2, uk. 263, 264).